

西

莊

始

存

稿

西莊始存稿卷十一

古今詩 望思集

風疾小愈子女相繼痘殤悲慘之餘詩以

代哭一百韻

寒飈撼空階陰氣晝慄慄客子多苦懷伏枕滯風
疾三旬稍蘇醒負暄強盥櫛誰知天未悔併力再
降罰命薄禍必重稠疊遭痛割喪子人間有我今
慘尤別一旬失五兒冤憤難具說長女已十齡長
男齒亦八其次孿生女六歲狀如一最幼三歲男
扶牀索梨粟云何屈凜冬痘疹相繼發寓邸托羈

孤醫藥起倉猝問訊少鄰曲往還斷親暱百事責

病妻蓬首心力竭霜天月痕淡一燈耿如漆長男

暨長女兩兩並天沒是時惟孟冬月之十五日幼

男復繼逝越日惟十七十九至廿四二女又終畢

衾襦成造次紙錢吹窳率呼天天不聞仰屋但咄

咄憶昔長女生荒村方寄活我時貧無賴乞食離

蓬華旅寓西鹿城襍被劇蕭瑟歸來走踉蹌一笑

喜排闥名取陶公詩非男亦怡悅陶詩弱女雖非男慰情良勝無

故名女 慰無 憶昔長男生南宮正蹉跌訪友到茜涇衣

塵聊拭拂寒缸燦玉蟲似爲添丁設歸來果得雄

快如眼鏗刮舉火驗啼聲包裹布裳裂腳跟如萍
浮呱呱不遑恤兩度洗兒時何曾我在室惟記二
女生歲暮罨風雪我將爲楚遊徘徊柅其轍數斗
盎有儲一束薪可藝旋復赴荆南離情愴嗚咽江
路萬里遙波濤驚蕩滴行行極夔巫鄉信杳莫達
寒閨刀尺勤補綻比鶉結儉歲迫催租那免饜糠
粒三年倦客歸四難走跣跋去時憐渠小歸時已
繞膝牛衣有何好團團尚難必屈指頻年中無幾
共飢渴明年惟癸酉長男頭角屹居然能從師書
聲朗鳴嘍我時賦近游歸輒相提挈瑟僴摘能了

之無悟來徹是秋我來京婦孕方彌月書報得幼
男客懷頓舒豁歷歷想前事一一可具述艱辛鞠
五兒十年顧復切貧家自乳哺荼苦真備閱奈何
天不仁一朝亡也忽兒亡皆以痘痘乎爾何物或
云是胎毒或云是血熱頗有衆良方先事能解脫
又聞種痘者此術盛吳越嗟我困奔走荆扉不能
閑無暇爲兒謀致兒竟凶折况乃北地居風土最
燥烈南人不能耐驟發勢難遏用藥又不慎誤延
醫下劣守視又不周誤用奴姦黠多緣人事乖豈
自天作孽輾轉屢尋思錯鑄六州鐵長男尤可念

岐嶷性聰哲尚記北來時去冬歲甲戌寒天驅就

塾衣短脚無韞試檢案上書叢殘壓籤帙分明口

授初孟氏首篇末九日十月十日試看牆上字模糊贖遺

筆親題嗣韋名擘窠勢豪濶兒自題名今尚在虎坊寓居壁上敗

履與破襦零星互聯綴不忍重簡點簡點痛欲絕

噫嘻我早衰顧影空皮骨行年三十四鏡裏見華

髮近復邁多病嬾姍類痿蹙驥子詩能誦袞師秀

無匹庶幾慰窮愁舊業足貽厥鬼伯一何狠徑就

懷中奪彳亍空舍中憤恨如有失返魂香不靈元

衣告無術眼枯淚不乾泣盡繼以血兒生極尪弱

囊空缺復米霜嚴未著綿暑酷或無葛見客羞蓬
頭垢膩聚蟻蝨有時炊煙停淒涼飼饌餽彼哉庸
福人滿眼蘭玉茁腐儒寒至此有兒乃長訣天道
本茫茫茲理誰能詰多謝故人意琴德來殷遠道寄來
札仙果生每遲佇待補其闕我非憂無兒有兒詎
終恣五難矧並喪瞬息忍飄瞥宦情蟬翼薄嬾縛
腰下鞞及此更何歡行當就耕垆春蠶絲不盡蠟
淚灰未滅擲筆黯無言觀空漫逃佛

丙子元日

銀燭朝正向九天金門竊祿又三年心驚兩鬢凋

霜後淚盡諸雛去膝前負耒陌頭違素業揮毫池
畔愧才賢蕭條羅雀閑門閉坐對青青柏子然

伏讀

御製上元觀燈詩念及江南被水狀恭賦一律
銀花火樹慶芳辰

睿慮偏于鄙屋親盛世有災如樂歲

聖人一飯不忘民帶牛佩犢須安輯剜肉醫瘡實
苦辛今日龔黃誰有意早舒上策荅楓宸

寄楊介孺明府

逢人殊難工枉道固不愜忽拍手版去飄然理歸

髡顏公磊落人亦作求米帖公今二頃荒郊靡恐
難闔客居知己少舊遊已難躡爲憶前度書沉吟
檢塵篋

哭九生十首

三年席帽鎮相隨曲几疎櫺跂脚時今日入門塵
撲地山禽來飲視邊池

松棚暮捲尚攤書劇論常教一起予手把課文纔

幾日空堂浙浙總惟虛

十二月中旬旬開生文
正月廿一日生逝矣

臘底曾來詢爾病爲言即起坐春風那知化去匆

匆甚白日從來不再中

生患咯血除夕前二日相
見云不久可強起至南城

相訪

掌上珠成水上漚去冬哭腫一雙眸更將餘淚爲
君灑天遣羈人不斷愁

世間嘔血不皆死爾獨奄然羅此遭爲爾當頭下
解語大都好物不堅牢

故人不見已三年挑盡龕燈古佛前悲喜相兼終

夕話寺鐘街鼓不成眠

生世父穆齋甲戌正月別去今春來京訪之西苑僧

舍談及生沒相對嗟惋

身是浮雲須變滅况于事業更浮雲紛紛蠻觸喧

爭者可惜斯言不共聞

生臨終云我許多事尚未作一件

西莊始存稿

卷十一

五

優鉢空中現一花歸其真矣不須嗟安知爾不胡
盧笑我輩迷家未到家

竹爐瓦鼎火微明長記寒蟲共短檠回首荒齋殘
月白紙牕彷彿讀書聲

方磚中廠貓兒巷鐘鼓樓街國子堂他日傷心重

過此恒河小劫對斜陽

四地名皆生與子過從之地

寒食哭嗣韋

忽忽經百五沉沉逾痛酸漸添
雙眼暗轉覺一門單語笑驕如昨
詩書付更難城窪澆飯處慟絕怯

憑棺

時權厝城南下窪子

追念嗣韋痛不能已復成絕句十六首

忽爾災生也太奇膝前無處覓驕兒細思禍福都

如此今日何曾昨日知

百年挂肚牽腸裏萬事傷心慘目中此恨綿綿無

日了綠章何術叫天公

洗兒時節客離家梗跡萍踪足歎嗟記得天吳縫

短褐一般醜面咒桃花

牛衣馬磨劇悲涼辛苦山妻鞠子忙此日撫棺枉

哭倒并無漲乳可流牀兒生妻自乳癸酉生次兒亦自乳時因病兒斷乳久

矣相繼天殤尤可痛也

七略三蒼頗盡窺未從方伎問軒岐早知兒被庸

醫誤悔煞平生不學醫

醫陳姓妄拔腹劑之劑遂不可活

敝襖遺鞵壁角頭看來無語淚先流重三下九嬉

遊處泉路伶仃尚憶不

名牽利逐走如梭八載匆匆一刹那漫說佳兒似

文度算來置膝也無多

兒生于戊辰七月十七卒于乙亥十月十五計八年

中子一入楚兩客吳門每與兒相聚旬日輒復出惟甲戌十月家口至京至兒卒之日團團滿一載

耳

秋風茅屋杜陵貧霸子長憐百結身赤腳蓬頭猶

不保瑤環瑜珥彼何人

問字呼來走欲顛餅中瀉水誦連篇元文每歎童

鳥去兒比童鳥促一年

揚子云育而不苗者我家之童鳥乎九齡而與我元

文今兒止八歲故云

去歲殘冬婦病中兒飢索飯叫門東今朝屏當銅

盤在更有何人一飽同

去冬妻患乳癰臥牀三月家止二婢亦不中使令兒

日高尚未飯也

凶宅人言是畏途移家作計太迂愚營巢性本如

鳩拙只痛巢傾失我雛

虎坊橋屋相傳大凶不可居于不知而遽遷兒果卒

于此

暫停旅櫬古城隈滿眼愁雲撥不開易水風煙薊

門樹此間何處望思臺

燈昏月轉淚縱橫驀地牽衣繞膝行落葉打牕殘

夢覺耳邊猶喚阿爺聲

巫峽當初寄客裝哀猿中夜聽霑裳而今身作哀

猿嘯未到三聲已斷腸辛未冬于夷陵峽口聞猿
同行戴綸長云此失于猿

也

墮地惟嘗病死苦浮雲忽散影形神向來未奉瞿

曇法今日方明露電因

三千驛路望家園幼小孤單怯旅魂送汝運租船

上去扶攜弟妹與温存謀從糧艘寄廬并幼
男及三女篋回里

岳禮萬峰圖

羅浮七十二嵩少三十六誰能割地肺絕境移尺
幅石作荷葉皴樹如鴉點蹙我若縛茅蓬一峰心
已足

御園偶題呈周石帆座主朱東江前輩

紫閣流雲濕紅牆照水明山如仁者壽泉比聖之
清過馬中官去影紳學士行腐儒踈拙甚空復點
塵纓

校錄進

御書畢

恩賜紵紗二端

三載銅龍著

賜衣今朝重幸被

恩暉磨鉛漬墨臣勞淺疊雪含風

主澤稀捧出先忘五月暑剪來新自九張機雙絨
急向親闈寄不羨回波乍換緋

蠅

明牕弄筆眼纔舒擾擾癡蠅不解渠偷食案頭殘
墨瀋撲綠翻自浣人書

同范左南朱竹君過教子衎衎平瑤海寓

齋

羨汝城西宅官居只似村巷深稍遠市樹綠恰當
門畫卷兼碁局茶香帶墨痕泥乾時走覓吟格欲
同論

自嘲

鉢袋隨身下版僧軒前輕後兩無能謀身真似信
天鳥入世翻疑好射棚堪笑窮魚思上竹最愁圓
莢要磨菱西山一桁長當戶蜷局何因策瘦藤

同徐用和劉階符朱寶香過松柏菴

園連官菜坊宣南城坳一曲留團菴斜陽忽露樹

金碧積水遠黏天蔚藍佛古生苔碎如錦僧眠補
衣僵似蠶相期欲果歲寒約掃地打鐘吾尚堪

題吳冠山前輩洗竹圖

竹體折疑笑竹色深似醉春叢洗更佳幽事農書
備先生白嶽居繞宅檀欒翠開課畦丁刪蕭疎逗
涼吹浮筠冉冉香乾粉輕輕墜披襟對此君清興
得所寄直節兼虛心依稀見高致昔聞雲林翁洗
桐開清闕此趣將無同渺渺滄洲意

題儵居齋壁

自從徙宅珠巢巷地僻遙連白紙坊門近豐宜甜

水足菴鄰松柏梵音長稍欣沈約郊居便終笑梁
董賃廡忙何日鷦鷯一枝就擬教題作卅勤堂欲買

屋取昌黎句
署曰卅勤

哭僚婿姚大秀才二十六韻

及爾稱僚婿相於廿載親唐韓應得並李蔣許同

論

唐光韓愈皆娶盧女
李漢蔣係皆愈婿

一別俄長訣驚聞劇愴神

幻形原石火昨夢等飛塵記得傭書日曾充坦腹

賓揚行塘外樹驚艷浦前春幾度舟同載尋常座

接茵謝庭聊遣日秦贅任長貧跣阿時相見詼嘲

總不嗔橫眠枕股慣倚醉拍肩頻熨眼年皆壯分

襟歲在辛三霜更楚萬萬里返吳津豹霧君猶養
龍姿我漸馴施羅尋舊好采菑托新姻子女慰無許字君子
雞黍重邀迓江村共笑嘖卷波圍栲栳盤鱸蒨
陳佛屋紅薇暖秧田紫草勻參覃歌緩緩結托走
跋跋上計成匏繫輕郵接錦鱗卅回看燕月兩番
憶湖尊故國傳靈潦窮鄉遘險屯正悲珠去掌俄
聽笛催鄰客至忙相訊書來轉怕真欄衫仍白紵
華屋已青燐妖鳥占庚子凶蛇逮巳辰淒涼寡婦
賦聊欲擬安仁

試院雜述十六首

槐陰滿院棘牆連掃地安牀得自便回憶風簷曾

六度纔離席帽恰三年初六日入闈居會經堂西廂子應鄉試四會試二甲

戊登第距今三年矣

萬里中秋月倍明廣場矮屋會羣英三條樺燭燒

殘後試聽春蠶食葉聲

書笈相將理白藤故人健筆競秋鷹笑儂此日了

公事翻似蕭閑退院僧陳吳企晉趙損之張策時蘇顯之曹來殷家八千諸

子

宛轉青溪水上頭板橋疎柳記前遊綵豪掃罷侵

晨出貫酒題詩十四樓丁卯同琴德寓秦淮舊事

聚奎堂迥靜無塵甲乙淄澠細討論列座分行盡

前輩賞音敢附九方歎

分校十八人諸公皆先子通籍

掩冉虛檐燭燄青眼昏腕脫蹇教停主人危坐都
無語倦僕垂頭誤觸屏

東來積卷多如筍疊向空箱夾以籤不向眉梢辨

深淺但從味外別酸醜

市瓜何意只求肥賣菜堪嗤計亦非響卜漫誇婆

惜得樓頭紙落已如飛

闌中以不得佳卷為恨

凌施好句苦而腴吳戴竒文格力殊不識平生李

方叔躍來能入網中無

上海凌應曾錢塘施學廉山陽吳玉搢休寧戴震也

數葉飄殘積玉墀寒蟲唧唧近簾帷到來屈指三
旬過又是滿城風雨時

牽衣入夢黯神傷漏斷西風夜正長誰料西河去

年淚更來鎖院灑千行

夢嗣
韋

校閱閑來睡思加汲泉差勝古城窪撐腸文字吾

何有但愛松風聽煮茶

院中有井差
勝外城苦水

繫鞵瀑直太匆匆欲奉籃輿悵莫同卻喜秋牕陪

杖屨儘容一月坐春風

會稽周學士石帆先生予
鄉試座主向以內直不得

常晤今
同分校

薄薄熏篝冷夕灰正愁瀉盡舊官醅索郎不是雲

卿餉鄉夢如何引得來

申拂珊少京兆送酒

萬柳堂前野水環高家園子菊花斑者回準策過

頭杖期爾同看幾朶山

去歲與梁山舟謝金圃約城東登高不果今訂出關

續前約高氏藝菊近有名京師

欣聞拆號定來朝釵釧應持換濁醪只恨挽鬢無

穉子入門餘痛轉難消

放翁定拆號日喜而有作云挽鬢預想諸兒喜倒指

猶為五日留又拆號前一日作云穉子歡迎先入夢從兵結束待還家

謝陳向山前輩餉酒用東坡監試呈諸試

官韻

我生酒戶窄鷓鼠謝萬廩非以矜獨醒枯槁性所

稟校文廁羣彥衡鑑慙未稔眼昏兼吻渴水鹹斷

茗飲先生遣從事數輩分膏瀋陵州與涑水一一

有題品欣然引三蕉侑之以蘇荏爾雅蘇荏荏方
言蘇亦荏也

苦辣猶勝甜自詫頗能審品酒者辣為上
苦次之甜為下空腸芒

角出酣酣快逾甚深院棘遮牆秋苔碎如錦宵來

蟾蜍圓一痕暗牕礮微吟同蛩悲孤影類夔蹠倒

餅剩餘瀝尚足解寒凜玉泉此際佳霜落魚聚滄

棗林亂殷紅桑下脫殘榭何當拆號畢相從敷襟

衽扶筇提兩壺自址陟其朕吾家婁塘側黍熟農

人諗一斗亦易謀南烹妙調飪自從客居來頽落

比瘦沈吟情日消縮鄉思攪夢寢先生詩酒豪造
化愁雕鏤載酒許問奇舌在那復噤作詩質先生
甕側且支枕

同邵舍人方虎集孫舍人中伯齋

莫厭打頭屋暗塵遮短牆座中無俗物酒畔是歡
場妙舞迴鸚鵡明燈障鳳凰潘家河上月扶醉踏
微霜

寄袁大令子才二首

弱齡登第壯歸田出處才名盡可傳今日江東歸
臥好陶通明後一神仙

北湖南嶽盡蒿蓬
煙雨長干六代空
只有袁家園

不朽任人圖作小屏風

作音佐子才有
園林在白下

題慶孝廉璞齋詩卷即送之金陵六首

西抹東塗愧我勤
得君喜張後來軍
江南薊北佳

山水都被收將冰雪文

月華如水滿階墀
椀大燈花照壁時
欹枕不知道

漏盡鑪灰劃徧細論詩

從容商略見虛懷
著實工夫莫打乖
學宋學唐都

是假但須學我自然佳

予昔遊武昌楚中名士畢
集一客問詩當學唐即學

宋即子曰皆不足學客大駭曰究當誰學予徐
曰學我而已孝廉以詩法相質故舉此示之

霜花漸緊愴離魂醉帽吟鞭又白門借得君詩送

君去馬嘶落日入孤村

孝廉送別白

通路亭邊薄雪飛棗林綻北夕陽微家人遙在江南望此去離鄉卻是歸

休耽官閣詠官梅紅杏園中待止才幾度廣寧門外望春前臘後早些來

予癸酉冬入京客况牢落之甚甲戌家口

北來歲除婦臥病呻吟相對乙亥冬殤子

女五人三度除夕皆情緒甚惡今歲丙子

正月復得一女至是除夕初能啼笑憶亡

兒輩倍覺傷懷不禁淚泫泫下也

三年除夕客長安寒燭清樽慘不歡此日纔添一
稚女當筵愁對五辛盤牽船未卜張融宅捐珮思
辭虞寄官七十古稀今恰半那禁青鬢漸摧殘

自題西莊課耕圖

草屋十數椽高柳八九株門前打稻場瑩淨如鏡
鋪彎彎婁江水分向吳塘潄架以獨木橋繞宅流
舒舒塘上乃我田方畝百畝餘西田在其旁奉常
之所居王煙客先生百年亭榭廢敗砌惟甍甍北望一
髮青煙嵐浮海虞蒼涼卅里內莽莽連疎蕪荒村

出炊煙斷港叢菱蘆居人業漚麻紡績助官租莊
昔婦翁有翁沒今歸吾此田極薄陋爲計良區區
地勢處窵下一雨通江湖縱復遇豐歲啼飢不能
無所賴勤力耕黽勉治沮洳飽飯未可希餽粥猶
枝梧假令并無此忍飢更何如我因略識字無力
把犁耨尚能戴筓笠指揮課傭奴生來作幸民擊
壤還歌衢自分終老此長伴畊田夫偶然隨計吏
一出乘柴車崢嶸阿閣開清班玷愚迂才劣識復
閤衆中空羈孤雀鼠偷太倉寧獨無愧乎矧乃賦
命薄膝前喪五雛心摧覺鬢凋淚盡見眼枯回首

舊柴門逝將賦歸與畫師頗解事點筆爲作圖莊
固未有名圖成意躊躇緬思王給事故宅松筠虛
多煩杜陵叟感憶成歌歛我今出處間事與古人
殊聊因在郭西斷章義取諸別莊今五載遠夢牽
菰蒲此圖當息壤有盟我不渝

題西莊先生課耕圖

莆田鄭王臣慎人

東吳才子瀛洲仙折簡招我開長筵酒闌示我
課耕卷卷中風景疑輞川自言婁東有舊業稻
田二頃吳塘邊老柳成行花匝地板橋野水流
涓涓微雨初晴近芒種黃粟留啼高樹顛斯時

課奴事東作行吟隴畔心安便自從釋褐隸朝
籍西莊長鎖松筠煙臥對畫圖空相憶清夢飛
落衡門前先生經術世希有雲瑞早見當臚傳
簪毫每書無逸句進講更誦幽風篇

聖明不次正登用入儲公輔出旬宣田園荒蕪豈
足慮且付張望司耕墾嗟我無田食破硯年豐
不給粥與饘代耕願乞升斗祿長安索米經歲
年欲歸幾度歸未得披圖使我心茫然何時得
遂為農樂扶犁叱犢耕春田

前題次梅村西田雜興韻四首

錢塘
梁同書
元韻

黑頭蕭散宦情稀
苦憶吳塘白版扉
半頃秫堪耕粟里
一間屋好住王微
門連曲岸平田近
江接孤村亂水圍
只恐故園歸未得
滿犁春雨繡苔衣

流水縱橫塵土稀
板橋一徑即林扉
東屯西崦經行慣
策額犁梢檢校微
泥飲每逢田父社
蹋歌長入野人圍
羨他陌上陰陰柳
正試風前白袷衣

憑君指點說依稀
別墅幽莊恰對扉
前後風流

二王在吾曹事業一鎌微尊鱸此日勞清夢桑
柘年來長舊園寄語耕氓休忘卻綠蓑真欲換
朝衣

風景村塍別後稀六年我亦阻歸扉知田自古
人猶少識字當時計已微江水分明前約在草
堂孤負好山圍何緣畫裏從頭見笑向緇塵拂
素衣

前題

平湖
陳朗
太暉

溪邊春水鳴隴上春泥泝愛此笠澤畔寄我三
畝宅臥柳散如絲細草軟可藉岸側欲生雲橋

平不用石夫子靜者倫綠蓑感疇昔江南盛農
事連陰啼格磔侵曉課長年荷耒聚阡陌田家
多古歡歌聲起絡繹柔秧插幾稜白鷺飛一隻
浩渺鶴樂深依稀鹿柴夕吾廬近泖西百里煙
村隔他年負策從尚有山中廸

前題五首

蕪湖
韋謙恒 慎旃

細柳絲絲拂短隄秧鍼出水綠初齊就中合有
詩人在獨倚斜陽看躡犁

曉樹初聞布穀啼農家月令夢先知社公雨過
新泥滑正是沿村浸種時

一髮家山望不違
陰陰桑柘護荆扉
鱸鄉漁舍何時到
寫出西莊抵暫歸

經訓畬畝日掩關
蟲魚箋注已全刪
定知進講趨

三殿無逸先陳稼穡艱
也辦腰鎌寄此身
買山無策苦逡巡
綠蓑青箬非君事
二頃開田合讓人

前題四首

廷諤鶚起

宿霧全開卵色天
遙山平碧淡生煙
連村雨足新秧長
龍骨闌拋屋角田

心曠身閑不似官軟紅塵土莫相干畫圖省識
吳塘路粟里壤西一樣看

草堂軒爽對晴暉片片閑雲度翠微
剝啄誰來問竒字課耕朝出鎮忘歸

大筆淋漓海內知幡然歸去問東菑
高文典冊編排畢一卷惟尋汜勝之

喜吳荀叔至

萬人海裏雨浮萍岐路分張已慣經
抖擻重辭細馬馱招要深話矮牕櫺
泉通鯉淀東西白雲起龍湫大小青
刺約老顛修禊事好攜畫榼出郊坰

三月六日

恩命充丁丑科會試同考官

賜內紵表裏各一端恭紀十韻

北極彤雲曉南宮鐵網開新綸飛驛騎

時南巡江浙大駕

絲雨壓輕埃

是日辰刻雨

賜錦今三度

甲戌登第乙亥校書皆嘗與賜至是凡三矣

持衡又兩回

丙子八月充順天鄉試同考官

翠緘遙捧至黃帕

敕宣纜百和香薰過千花蕊蹙來龍梭交劍貼鯨

尾掉瑤璫貢篚看題字

題有乾隆十九年蘇州織造臣某進字

宮花

配繡菱

每人各分金花二朵

青蓑想初服赤綬荷趨陪自愧

虛酬報空期拔草萊昔年辛苦地尺度漫量裁

試院用東坡煎茶韻呈錢坤一盧紹弓梁

元穎諸前輩

階前草芽細細生檐頭鴿雛穀穀鳴重來半年一
彈指依然煤炕氈簾輕南宮風月妙兼二誰會此
際憑闌意參苓入籠一味煎應從塵匣探龍泉况

值同文遍羌蜀

大金川準噶爾相繼平定

新令采詩期戛玉

初改

第二場試五言八韻詩一首

不願官中細腰偏忍飢不願城裏

半額誇長眉風流時世競妝束佳人空谷羞趨隨
此夜白袍門外齊立鵠相看忽憶十載燈寒時

贈鄭慎人

我交天下士獨未及七閩都亭一尊酒把手得鄭
君君本夾漈後淹洽該無垠四秩頭鬢蒼三舍身
名淪王城雖堪隱失職誰同羣驢有令僕才鬼善
抑揄人摧藏濩落餘還見意氣振招尋到委巷險
沫情何親密契步亦步妙論醇乎醇蹒跚著木屐
油素提攜頻戢香先正言編比如魚鱗君輯莆田
風雅已刊
其半我續伯恭書遺文半羅陳予方撰續
宋文鑑倚賴多聞
子剩馥時見分迢迢九鯉山下有破籬門他時泝
軟灘燈火應堪鄰

恭和

御製自金山放船至焦山用東坡韻

仙人不愛大廈耽瓜牛廬結荒山南千年初地開
點點幾輩禪侶來三三試登絕頂一瞻眺西津北
顧皆眠蠶方知三山此雄長豈獨鼎峙能無慙衛
公柏倚欲落石華陽銘臨無底潭我

皇昔年攬竒勝山靈奉職呈春酣林嵐峰翠快登
陟朝鐘夕唄供元談六載花宮復停

蹕依然金碧圍苔龕弔古猶存狼石狼問禪還契
甘露甘江山從來雖擅絕不經

聖賞人未貪一自

天藻寵崖谷濟嵩敵華寧難堪從茲靈異標萬古
騷人競說松寥菴

恭和

御製汲惠泉烹竹鑪歌韻

松陵茶具昔所聞十詠一一都籃分未聞茶鑪舍
陶冶翻與筐筥爲同羣智者創物出新意黃篋編
得清無塵桑苧見此定驚倒異事不必師前文高
僧性海方法妙舍人渲染留芳芬篁墩西涯各歌
詠留題往往皆宿陳四百年來遞更製好事愛此

同自尊遂使鐫竈盡可廢後來居上如積薪九龍
連綿龍角蠹煙嵐滿隄離囂紛我

皇莅止一披卷大文掃卻曩云云中冷已汲浮玉
嶺第一第二徐評論溪翁樵叟雖善品未若

睿鑒能長存只今泉石加疏鑿松濤竹籟交鮮新
仁智寓物不繫物揮毫聊復留墨珍我

皇方救萬姓暘區區陋爾煎茶人

恭和

御製鄧尉香雪海歌韻

鄧侯化去非故吾惟有山色長如初支峰別隴梅

萬樹以配雲海寧云誣錢家礪旁凍萼坼馬家嶺
上苔枝鋪西溪河渚那復數空濛更壓孤山孤我
皇昔遊未遍訪重臨二月韶光紆輕嵐幕歷開士
宅石徑窈窕樵人途繁蕤亂蕊照晴昊冰魂恍惚
羅浮趨催開羌笛宛轉裏欲落畫角昏黃餘海山
仙人冉冉出練裳縞袂浚波娛十洲縹緲瀉五湖
方壺圓嶠景不殊閻浮界中一漚現髣髴靈海潛
委輸白波偏擬山偃蹇雪海卽是林扶疎山海互
易幻相別拈花妙義參如如方今

聖世波不揚永靜海若恬天吳永靜海若恬天吳

空山嚼蕊安潛夫

蕪湖人湯鵬鎔鐵作畫山水花木無不酷
肖梁山舟家有叢蘭一架屬賦

赤堇山破若耶酒寒光溶溶冶不躍崔徐董巨各
驚卻鍾筐巧忽移鳧削何人後出啟靈鑰鳩茲一
生妙摹拓有時衆皴堆垠堦三茅九華隨染掠興
來放手疊跗萼亂坼欄花抽砌藥我初聞之喜盤
礴忽見君家挂齋閣鐵汁鉤來墨花錯何異所翁
仲姬作洞庭泠陽芳杜若煙輕露重微波弱湘娥
愁春步綽約靈均欲下魂漠漠韋偃畫松勢揮霍

曾將屈鐵擬其略鐵耶筆耶此無著幻形互換忘
糟粕雲煙過眼多寂寞此畫傳之定不鑠楊梅斜
街古藤絡主人不出瘦如鶴幽蘭猗猗石鑿鑿廣
平之心花曰諾客來無愁浣餽飪只防缸酒橫遭
攫

題吉渭崖練湖看荷圖

觀音山中玉乳濡曲阿城畔琉璃鋪湖光演漾四
十里花花葉葉翻芙蕖先生詩名不減吉中孚舊
日結茅湖上居門前萬頃淪漪舒謝中郎今已徂
此水停注終古仍不枯掠波小艇如野鳧筆牀茶

竈隨所如花爲四壁船爲廬江湖散人煙波釣徒
衣裁荷葉筒截荷跗謁來京華佩銀魚回首清夢
牽菰蒲練塘渺渺在何許白藤笈裏攜得一幅新
橫圖朝來過我索題句披圖約略重踟躕雲陽煙
水區幾度經過餘覆船峰綠如黛馬林溪滑如酥
只恨往來不遇六七月不見千株百柄紅雲敷薊
上景物雖與江鄉殊碧裳翠佩何處無玉泉甕山
淨業湖薰風剪剪飄霞裾我儕清暇日無事那不
挈榼還提壺子歌我和其可夫

同蔣遜儒李素伯盧京甫上至山重過陶

然亭

潦縮鳧翁去亭虛燕婢來壁尋前度墨履剔此時
 苔老樹空腔拔遙山沒骨開夕曛知我意緩緩墮
 城隈

同胡質餘梁調夫蕭崑田汪星巖方鱗伯
 過憫忠寺

踏葉人迎淡日曛臂鷹手欲佛燈分松陰又轉三
 叉路菌閣堪擗兩角雲塔尖金鈴猶有字瓶空藥
 玉幾時焚寺有遼應歷六年尼薦福大師石幢稱
 大師奄化茶毗造塔金鈴響亮云云又
有石函一方四面刻僧名及布施
 物有云舍利五百粒在藥玉瓶內幽尋每到昏鐘

後冷伴相期張一軍

題霜林煙水圖送邵鴻箴編修南歸

勞生失本性豈獨違
名山只此一水石邈如隔瀛
寰羨君歸裝輕葉舟通潞灣
攜得三尺卷興在滄洲間
颼颼霜風緊漸見衆綠刪
天公嫌秋淺染出疎林斑
幾株淡者黃幾株濃者殷
蕭蕭寒流色琉璃淨無癥
爲愛滓穢除并絕鷺與鷗
彷彿燕龍圖點筆掩荆關
江南如此景隨處堪登攀
肯使六街塵日日上鬢顏
君今行入畫掉頭不可扳
一帆五湖東江楓轉灣
環遙想林居人萬事如等閑

恭和

御製秋獮回

鑾九月二十三日請

皇太后安畢于圓明園大西門樓前習射

命哈薩克使臣列觀班末疊舊作韻四首

風行絕域令如山大宛來庭豹尾間遠使趨陪容

肅肅

皇威親示藝閑閑時巡乍返三驅隊視

膳初迴七校班最是歡聲雷動處降番齊仰鑠鑠

彎

版圖久已定燒當遙控河源一線黃試睹

天弧流激電那容遊蟻穴枯楊

阿睦爾撒克阿不賴欲

擒以獻為所覺

復走鄂羅素中和共訝符狸首迅速羣瞻飲練

光指日餘逋咸就獲好分飛鏃殪貪狼

流沙西極遍呼嵩舉柴重欣此會同萬里天遙歸

赤縣九秋霜勁試彤弓

恩周猶切鳩磬鴈

御製念及江南賑荒事

武赫還看碎畫熊

多少羌兒驚未見

聖人餘技亦神工

徐收金埒穩垂鞭蕃部追隨

翠輦前允武允文原合德來王來享各瞻

天渥洼遠陋歌名馬首荷無煩種大田聲教從今
真莫外五縱雅化邁周年

上得側理紙二形製奇古書一藏一作詩志之恭

和元韻

緝柳堪成編截蒲乃鋪几麥光爛無瑕藤角淨如
水誰剏新樣奇碧苔掣海底蔡侯退舍避子年援
筆紀

聖人性海寬墨波展餘技宵旰暇無多更灑十萬
紙兩幅入香厨

睿顧顏有喜圓呈獨繭形細蹙羅紋理旋轉任卷
舒循環無終始裁來霜色明揮就虹光起臣聞珊
瑚枝本出渤海裏此紙幸被收亦如拔杞梓雙璧
自難分其一還藏匱微物慶所遭茂先焉敢擬

送曾謙益先生之官郴州二首

牛腰詩卷壓裝輕薊酒纔傾問去程千騎共看迎
父老雙旌豈爲厭承明畿南路指丁沽水湖外帆
飛亞字城欲奉藍輿期莫遂朔雲寒菊愴離情
憶從桐汭侍音徽十載萍踪隔絳帷燕市勝遊陪
未久洞庭遠道迹仍違送行易觸懷鄉感惜別多

因知己稀遙望山攢明鏡裏瀟湘流下總依依

送蔡葛山少司寇乞終養歸漳浦四首

經術追三古名家重七閩細旃時進講正色儼垂紳北闕

恩逾渥南陔願竟伸從容全出處當代信無倫

少海資承弼西曹倚股肱引身雖聽許戀

主轉難勝跡頗同疏傳情還異季鷹望雲今克慰不獨慕菰菱

疎柳短亭牽秋程返照偏潞沙催別舫楓嶺冷吟鞭紅樹海雲外白蘋楚岸邊版輿多暇日點筆賦

歸田

綠服公心愜藍輿我意違
沉吟感知已悵望想容
徽別浦荷衣老開園藥
甲肥扁舟何日就來欸
故山扉

題蔣升枚桃花溪水草堂圖

桃花塢裏桃花橋桃花溪水齊
牛腰蔣生三徑恰臨水草堂
花木森周遭兩株老梧影橫碧
一林新筍頭如貓空齋但聞拓
碑響四壁金薤琳琅交君家
嚴君妙行楷一時老輩相招
邀我時抗顏登上座酸寒意
氣空麓豪少年淪落倦行旅
塵土黯黹

欺青袍念生從遊意良苦寒牕席硯綿昏朝把杯

情話漏數下青燈涼月風蕭騷屈指溪旁住二載

別去遠道尤無聊三湘七澤走將遍歸來仍繫溪

邊舫登堂握手一歡笑舊雨又得王吳曹琴德企

子我時再客葑溪上桃溪相望仍非遙三日兩日

一相見有時留宿開疎寮玉爐銀葉散甲煎錦衾

碧綠青紅繚拍手語生生絕倒平生如此睡幾宵

昔辛敬之過元裕之裕之留飯敬之飽啖畢謂裕

之曰予生平如此飽不過數次耳余嘗宿升枚齋

臥具甚麗因援敬之語謂升枚曰予生平癸酉之
如此美睡亦不多幾宵也升枚為大笑

秋與生別郭門臨發自打包不才僥倖侍

帝側舊遊回首翻勞忉近聞桃花水無恙依然花
片飛春潮書來索我賦長句畫圖渲染形神超武
陵源頭萬樹在川原遠近紅霞飄玉山清闕本可
戀况我夙昔常消搖桃花潭水深千尺相思如水
深迢迢我生懶拙百無用素業本自甘漁樵他年
結鄰倘可卜爲我更縛三重茅

西莊始存稿卷十一

西莊始存稿卷十二

古今詩 知時集

十月十七日自珠巢巷徙順承門大街料

理麓完雜題齋壁六首

家具少于車新來摒擋餘鳳城仍倦客菜市此深
居不願因人熱惟應愛我廬鋪牀忙未了子細理
殘書

別開三徑曲爲避六街喧狹拓牛鳴地興迎羸髻

痕

門前可望西山

已教安茗竈佇待縛糶樊造請經年斷

誰敲樹下門

蓬勃謝飛塵，娑拖著病身。
東風馬耳過，蒼狗白衣新。
樸學安時論，初心對古人。
妻孥知懶極，不復訴空困。

青棠可蠲忿，兩樹恰簷端。
疎影傳宵聶，佳名記合歡。
搖風艸葉落，戰雨敲皮乾。
預計來年事，穠花滿眼看。

九門風雪後，不出類寒蟲。
讀畫醫治悶，繙經勾當窮。
低俚牕紙白，堅擁火鑪紅。
忽憶銅坑路，巡檐有夢通。

獨坐杯還把，長吟枕或欹。
萬間廣庇意，一室掃除

時歲月看蓬鬢江湖負釣絲回腸餘痛在三復退

之詩

退之示兒詩昔我入京師止攜一束書辛勤

餘書以示兒曹其無迷厥初今予買屋定居嗣韋已天歿故云

恭題

御畫冬景小幅八首

驚瞻

天筆喜難名竹樹雲山分外清

五夜焦勞餘少暇金壺還見墨波傾

三白豐年恰應期平蕪竹石影參差我

皇腕底寒山色正是千門雪霽時

華嚴法界妙鎔裁彈指雲嵐小燈開大地溪山皆
粉本旁觀何處仿摹來

三尺犀株蘚石尊一叢翠篠戛瑤琨淋漓元氣看
猶濕豈復人間點筆痕

渲染都由

睿思餘環中方外證如如數竿玉版迎風舞參到
拈花一笑初

苔枝瀟灑伴霜筠暗逗風光蓓蕾新蘸得墨花寒
谷變果然天上有陽春

玉笏青螺羃遠煙蓬萊左股割瓊田無邊風月天

然畫那數遙山郭恕先

落魄江湖一釣徒

鑿坡幾載拜

恩殊得觀

奎藻蓬山上從此心輕十嶽圖

冬夜東齋

寺鐘纔動掩茆堂任爾笙歌沸隔牆

東鄰有歌院
每夜聞度曲

聲撐拄愁憑兔璣碧破除閑付鴈鐙光簾釘響處

風驚牖樹影橫時月轉廊一事長安煞奇絕著書

筆秃滿堆牀

送鄭慎人之成都三首

詩人遊蜀有成例杜老涪翁與務觀火急安排天
大膽休教壓伏就酸寒

量煤數米

帝城闔鼎鼎年華袞袞塵君又殘冬拋我去矮燈
炙硯共何人

扇子巖頭第四泉蝦蟇碓下自烹煎君行見我留
題處回首東華一悵然

歲暮漫成

昔聞陶宏景三十六方奉朝請頭顱如許不如歸

徑去結托華陽嶺又聞柳儀曹三十七年如暮朝
向後景光難把玩顧影感歎心煩勞我今已及柳
子年未學貞白行歸旋跳丸轉轂鼎鼎裏五劇三
條得得間支離疏身固無害監河侯粟亦可貸寧
使鮎魚上竹竿不作猴獼落布袋

丁丑除夕

蠟燈影裏髮鬢鬢四十明朝只欠三歲暮日斜時

已迫氣麗言大句猶慙

樂天詩行年三十九歲暮日斜時又莫怪氣麗言語

大新排十

五卷詩成

掌中一顆珠重睹

今夏六月復得一男

衣上五年

塵舊諳

癸酉至今五度除夕

多事比鄰喧疊鼓依然節物似

江南

東齋即事

烏巾欹側據藜牀
石鈿風爐自候湯
天入微陰低
卯色雨侵矮檻臥
丁香繙書漫擬編
欄俗止酒聊
憑禁架狂世態
而今看爛熟
關門洗足謀真良

春暮戲用數字賦九言律詩寄彭芝亭沈

歸愚兩前輩

八門中穿三百九十橋
六坊迤邐花市連
茶寮天
教二老再起汪韓後
謂鈍翁
我擬一塵遠
赴求點
招通籍五年歸夢千里隔
問字兩家濁酒何時挑

萬人海裏又過風廿四有誰解賞
彘琴絃七條

詠白丁香花二首

陣陣催花綠雨敲春條結處展輕苞
融酥齊放歲
粧鎖膩粉初勻豆蔻梢雲母牕前風不定
水精簾
底影相交縞衣淨把鉛華洗太潔何妨任客嘲
柔枝亂墊玉闌干雪茵霜釘簇作團插傍搔頭成
一色折來絡索訝無端月籠的的還多態露裛
皚
皚尚未乾競說唐昌仙子降此花幽獨有誰看

送家東白之蜀二首

汪倫前歲向西川鄭谷今年客左綿

謂汪雲矯又
鄭慎人

見王郎理行笈定知題徧浣花牋

僦居每愛佛燈旁時向禪房問海棠

君寓謝金圃齋在憫忠寺

側寺中海棠最盛

此際碧雞坊畔路吟顛別自為花忙

題杏花春雨圖送宋觀察乞養歸長洲

首

枝頭紅杏尚書句春雨江南學士詞箇是使君一

家景萬人海裏没人知

吟鞭醉驪拂花歸到日梅天綠雨肥最是家筵捧

觴處錦衣不羨羨斑衣

送相國海寧陳公

予告歸里次留別韻六首

房謀杜斷一身全

溫綽宣來許引年特為史編留盛事寧從山澤學

臞仙拜章北闕重增秩祖帳東門敞

賜筵剩有橐金供治具

君恩渥矣肯營田

公得請後加太子太傅筵宴令部院堂官往餞

頒賞賜幣

金五千兩為路費仍
案原品在家食俸

尺五城南斗極臨青箱早歲探儒林大文獨蘊中

和氣樸學深研濂洛心共羨韋平承世澤從教瓌

頰繼徽音科名端為人增重出處何曾繫組簪

天語榮褒下紫庭

世宗憲皇帝嘉公視學
聲名可比李文貞張文端儲端

拔擢到槐廳乍欣春涖青齊壤旋暗芒消貫索星

曉直殿頭寒露濕夜批牘尾短燈熒大賢事業原

殊衆須信淵源在六經

獨角神羊最善鳴崇班聽履得徐行范公胸自藏

兵甲郭令人推似父兄已喜明良傳一德果然心

迹遂雙清午橋畫錦優閑地別向名山寄嘯聲

二朝德望迴崔嵬八表遐齡取次開定有邊人驚

再相未容洛社屢銜杯長途

特勅軺車送安信憑傳節使來龍馬精神還似舊

層霄明處望三台

上諭侯家居一二年自行酌量精力尚健仍可來京供職並

命馳驛回籍巡撫二司時加存問

不才初欲涉文瀾換骨叨分九轉丹每荷品題心
竊忝常思摸索暗中難絳帷立雪粗聞道玉局條
冰敢負官惆悵歐陽歸潁去揩摸遙傍五湖看

邵楠亭園中雜詠六首

池上草堂

鏡面平波皺磬頭倒影微參差魚在藻上下鷺于

飛

蕢山

蒼藤寶纓玲瘦石小玲瓏勺水欲添瀉寸雲還自
濃

半偈閣

僧衣圍平田佛髻鋪遠翠花月一家春煙蘿無盡
意

花園

籬門無剝啄只有蜜蜂喧藥甲纔掀土園丁早插
樊

真意軒

水木偏宜淡雲林不厭深風泉多靜籟中有無絃

琴

清樾館

竹色如我閑松風與人語山靄入空簾流雲自飛去

東軒偶然作四首

嘯傲東軒下聊復得此生爲愛陶公詩取以爲軒名軒在宅東偏連延纔兩楹莫嫌庠狹甚且喜心迹清空簾敞虛檐低牕送餘明亦有白木牀亦有素紙屏偶展一卷書遠見千載情日入不遑息繼以短燈檠誰言軒中客終日無所營

靜寄東軒中春醪時獨撫爲愛陶公詩願作東軒
主移家曾幾時又見春歸去啼鳥多新聲綠樹亦
非故俯仰觀大化冥默如有悟古人既已遠今人
誰晤語兀坐自無言嗒焉朝復暮

經旬嬾出戶亦復少賓客居然成大隱不覺在京
國豈云慕高簡聊取性所適流雲過疎牖蒼蘚上
暗壁形神既無累心遠非地僻

至人得止觀何有寂與喧下士修我拙其術在閑
門侵晨澹無事開襟臨前軒因思我軒外門前九
衢塵機智相傾奪倏忽千萬端相去祇咫尺夷險

遂中分義農去我久誰能復還淳且理軒中事軒
外母復云

送彭長人乞假歸南昌

西江詩人卓錫脚蔣奇王雅

心餘
秋士

君能參蔣子儼

居嬾眠卷二子西市吾宣南晨星錯落過從簡偶

爾把手情還快憐君槐廳乍棲宿遽夢越鳥思袖

帆十千酒兌悔不同醉一百五廿四風過又未同

賞三月三丁子香始坼辛夷蕊纔含如蛇去意遮

不住離情千尺飛春潭京華我客今六載吟力漸

退無鋒銛非徒山水少登陟正坐舊侶分張咸篋

中簡點半是送行句國門眼見一一鞭歸驂况君
逸格我所畏妙遠確苦深而嚴青蓮自出水其心
泥不黏大澤騰飛黃圍人漫施銜傳衣法嗣呂自
許簪花美女楊能堪弓衣競織井邊唱那計上竹
愁窮鮎五城塵撲征衣黔愛君卻掃垂疎簾白藤
書笈塞破屋繞牀旋折皆經奩倒囊出示新著好
劉略阮錄懸排籤何爲一朝舍我去使我坐愁行
歎心如惓豫章城頭勝地兼西山南浦烘晴嵐章
江引櫂一帶曲快閣凭檻孤雲共歸期正及櫻筍
熟三徑無恙添松杉江村佳處雖可戀短告未許

長澗淹明年遲君到日春未暮準擬復輿出郭齊
幽探一林修竹摩訶菴一拳瘦石盧師巖

鄰家椿樹恰傍東軒戲題六首

過牆鄰樹接餘青一蓋童童覆滿庭更訝香芽冷
淘便浮來卵椀有竒馨

杜陵桃實饋貧人此誼難從薄俗陳嘉蔭還堪多
借取莫將王吉棗同論

此樹禿枝空有葉我頭未白早成翁天涯配爾翻
蕭瑟生意婆娑感不窮

質非樗櫟也能全坐閱春秋歲八千才與不才真

可處細參妙理養天年

搖風漏月鎮扶疎十二明牕送影徐他日可能成

故事有人樹底著叢書

鬪雀爭枝蟻穴根靜中觀物訝囂喧主人不出經

旬懶眼見枯桲綠又繁

三月十九日

正大光明殿

御試詞臣蒙

恩特擢一等第一人二十二日引

見勤政殿由編修超授侍讀學士恭紀六首

五載蓬山手一編正衙猶記聽臚傳許身不敢他
途進孤立終邀

聖主憐自揣羅胸無錦艷寧期摘領得珠圓右銀
臺畔深嚴地特達驚看冠列仙

彷彿唐規試五題華裊

賜坐兩行齊自鳴鐘動催亭午食葉蠶聲走赫蹏
中使玉盤頒粒粒小侯乳酒送玻瓈

殿頭飽飫

天厨出歸路爐煙滿袖攜

乙覽親勞細品評爭傳

天子取門生

一人知己真何恨國士無雙許不輕掣得錦袍承
柳綠分來簾扇映花明敢言幾輩皆王後沈宋同
時各有聲

門開明福古槐青拔擢新占鵲喜靈乍訝宣麻移

隻日

唐學士隻日宣麻

旋教躡履到頭廳馬銜

恩顧頻嘶櫪禽煦春陽自刷翎破格殊榮身受處
感深惟有涕交零

麗正宏文並秘書歲巍丹地略相如白圭振鷺心
常凜握槩攜鉛職恐虛西掖挽鈴燒絳燭北扉視

草曳華裾金鑾他日如成記莫忘承天雙引初
壯歲名山抱膝吟登朝已見二毛侵玉堂海燕回
翔影翠岫閑雲澹蕩心經術還期通話訓文章雅
志薄艱深惟餘

異數終難報攬鏡躊躇愧組簪

西莊寄紀

恩詩次和奉簡并呈辛楣六首

宣城張汝霖雲澗

一從歸棹度龍編賸有驂鸞錄共傳鵬鷖不妨
成各是夔蛇空復解相憐幽居苔向繁欽碧晚

五言古詩
卷一
歲松如鄭老圓忽在瑤華勤問訊故人今領玉
堂仙

御筆親將甲乙題詞臣

恩寵若爲齊朝看金殿探驪顛暮許銀臺散馬蹏
鎖院法尊香脰肫退朝寶炬爛玻璃鑿坡他日
攜遺事應有湘東斑管攜

花鳥三山待論評奇遊遙想冠平生潮迎螺女
榕陰亞關接江郎箐雨輕宮錦堂前拜家慶使
星天上返承明會稽南部新吟奏願助簫韶擊

拊聲

時方奉使七
闕乞假歸省

山刊岫嶠字形青龍畫螭書守百靈金石長垂
六一老風流又占第三廳雲疊手拓歸珊網鵲

錦工褫刷皂翎小謝樓前魯公石移書珍重探

竒零

君撰翠墨小箋屬
訪宣州顏公殘碑

擬借盈車秘閣書士安羸疾願何如枝官南楚
終嫌散樸學西京久笑虛獨抱遺經供枕籍勤
疏夾註裂衣裾大航魯壁紛紜後憑仗推明合

古初

尚書古文後案
聞亦脫稿矣

仲文高步與聯吟才瞻寧虞鬢雪侵鄒馬雅孚
同籍望劉盧兼展世姻心城當橘柚寒偏早秋

入江湖水易深何日長安尋舊雨
慈仁松下盍朋簪

大雩前一夕同梁山舟朱石君沈欽伯齋
宿天壇宏濟寺二首

青豆房中共打包斜陽一抹下松梢
長明分得龕燈影數遍昏鐘百八敲

櫪馬嘶風夜有聲微茫星斗欲三更
推牕好時林端望已見金支萬炬明

爲介景菴少宗伯題岳蕉園畫卷

先生心跡如虛舟流行坎止隨去留
惟將山水寄

靜觀海懷霞想凌滄洲平生星軺極萬里秦關楚
塞兼吳頭勝地過眼不再遇聊憑畫卷當臥遊今
朝示我此橫幅恍惚初地開丹工蕉園本是靜者
流筆底爛熳煙嵐浮即如斯圖乃學北苑法墨花
飛處真宰愁一峰擢青蓮衆峰橫翠虬登登細路
轉山脊竹梢藤蔓寒颼颼人家三五傍厓際盡收
蒼翠歸山樓陵陽白岳接皖口渭川杜曲連龍湫
今之此圖妙結構舊遊回首同乎不何當暇日從
公追勝賞煙波深處招沙鷗

寓堂合昏樹二株夏日作花可愛得七言

長律十二韻

荷乍抽錢絮點空愛他雙樹坼薰風高撐幄幃重
重合輕抹臙脂淺淺中經雨滿庭香旖旎知時堆
萼色龍葱艷如紺袖酥成暈淡比緗裙絳欲融金
剪忽裁新樣綵綠牕何處吐來絨鬢垂細數原無
瓣毬簇交枝自作叢槐影微炕知異態萱房蠲忽
好同功看朱展轉疑成碧按茜評量休洗紅盡日
空階閑弄影撩人薄靄與初烘試徵炎帝千年錄
恰傍嵇康一畝宮客裏移家都爲爾花邊約伴賞
誰同他年記取微吟地宣北坊南菜市東

王學士庭前合昏花兩樹盛開招集同人

讌賞即事賦呈十二韻秀水錢載坤一

學士能招客幽情可賦詩一雙嘉樹在風日小

堂宜葉密方交影花繁只吐絲涼同車蓋蔽濃

似馬纓垂漸向斜曛斂頻將碧鱗節無憑或蠲

忿有信太知時憶舊曾看此頻來為訪師可憐

勝拱把相對即階墀曩丙辰歲涂尚書居此桑

來見兩樹未白催吾鬢成陰到汝枝乍偕諸友

初作花醉何止廿年遲摘朶還收藥攢鬢漫畫脂宣南

坊裏白臭味忍差池

王玖畫

寂寂數粒松蒼蒼千仞石古寺在雲巔奔泉落巖隙

翰林東廳古槐三十四韻

滿院撐危綠修柯走暗青根疑元代植幹自有明
零病理曾傷燒空心想劈霆盤坳欹欲臥呀裂洞
開扃密雪回回壓嚴霜歲歲經排雲餘碎葉作態
罩空庭似櫟常依社如槎幾漱溟婆娑疑被觸拳
曲豈遭刑兔目春猶坼虬身晝亦冥义枿空偃蹇
拗怒轉伶俜突兀森貫育便娟謝尹邢屬影鄰瞞

樣癭凸宿瘤形最醜蒙供面全僵貳負靈貞容還
耐禿古貌尚餘馨黛簇千層甲皮皴萬箇釘聶時
同布幄炕處儼張屏蛇忽當門鬪夔惟一足翫騰
那鵬出喙軒翥鳳拖翎蠹窟旁蒸菌苔文曲繞銘
膠枯寧化珀枿老詎抽苓不碍昏煙幕偏宜夕照
停雨兼濤浪沸風作瑟竽聽斷節中流血成精上
應星匠師憐棄物太守歎頽齡舉子忙何意蟻王
夢乍醒支離當散地擁腫占頭廳吏拾枝添爨僮
慵汲沃餅登登來啄木閃閃聚殘螢作賦應逢庾
司花不藉丁垂陰疎的的絡格靜熒熒細蕊時飄

瓦低梢故入櫺餘滋借劉井接蔭映柯亭羣卉漫
爭麗孤生誰所令素心還共賞珍重比堯莫

夜合樹下取涼

生衣風透欲生稜閑捉稜毛自拂蠅一事貧家真
得計濃陰省卻搭涼棚

題畫爲于石薌賦三首

鏡面春江嫩綠銜溪橋絲柳舞摻摻薌芷也有江
南景只少煙中一片帆

白雲遠近薊巖坳塢裏人家短架茅料得深山無
六月玉虹隱隱挂松梢

羣峰回合似旋螺翠樾紅泉白石瑳結得芭籬緣
澗曲釣磯安穩占鷗波

有事方澤齋宿玉堂奉同虞山公用文待

詔韻

聯翩冠珮戛珊珊月轉槐陰六曲闌三日齋期人
郁穆頭廳閣子地高寒吉蠲相戒先申令盛禮由
來配泰壇好是木天清不寐從容拄笏傍金鑾

苦雨

黯黯癡雲鎮自蒙空階點滴到愁中巷泥沒踝無
人到屋漏移牀笑我窮月額經旬仍未散未頭干

畝定成空私蛙底事乘陰氣得意號鳴轉覺雄

喜琴德至信宿敝齋移寓椿樹榭心餘
有詩予亦作一篇并懷來殷

乾鵲語簷牙喜母緣衣船侵晨咳嚏發昨夜燈花
然開門果見故人至入門笑擲馬上鞭驚看鬢邊
髮各問別後年有如調飢獲大嚼又如瘡疾欣初
痊仙爪爬背銳刮目籠鳥入雲魚縱淵騾綱纒卸
堆滿屋通宵鄉語還蟬聯猶記廣寧門外柳絲牽
路旁悵悵送爾旋車輪無角馬蹄圓欲留不留心
悵悵聞爾屢醉平山堂聞爾獨吟趵突泉聞爾冶

城時躡屐聞爾鯨水時扣舷卷中詩句樂人唱海
內高名孺子傳一朝文采動

萬乘官職入手何翩翩翻階紅藥語定妙判花小
鳳毫逾妍春明儻居宅一廛作使奴子琴書遷短
牕先糊紙矮炕須鋪氍安牀掃地忙不了隔巷已
送新詩篇奇兵迫人未成列半渡遮擊森戈鋌我
時枯坐但旁睨銜枚堅壁張兩甄敢言我盈彼乃
竭聊以整暇當精堅吟塲角逐今廿載得當大敵
喜欲顛從茲社集羅羣賢機東雲西互邀迓張南
周北相排連不愁寡和彈獨絃所惜江東二妙尚

未全帆山一漁遠滯湖村田聞說麥黃水過定解
纜屈指何日聚頭泥飲沉頓同樽前

重至京師宿西莊兄齋中口占爲贈

青浦王昶琴德

殘雨空階夕霽天欵門相見語纏綿江湖屢憶
開樽會燈火仍來抱被眠夢裏春明嗟再到篋
中詩卷愛新編多君話我爲官在不道維摩已
解禪

立秋日合昏樹下作

結夏深憑雙樹幽迎涼又喜葉知秋殘花歷亂松

毛似細穗低垂皂莢稠斜日影中時仰面暮蟬聲
底坐消憂自嗤言語麗豪甚欲比韓公詠五楸

郊外散步

水縮見沙明木落知風勁長嘯不逢人斜陽澹秋
影

寄題岡齡弟盤溪草堂次韻四首

城居真似沈尤居家少于車信所如農丈人中原
有伴齊民術外更無書客辭餅餽因看畫夢斷羊
羣不踏蔬箇是江湖安穩地瓜牛大好結蘧廬
花步相於賦卜居西塘還往駟蛩如

乙丑予館岡
齡之花步居

西莊始存稿

卷十二

先

壬申予客郡齋而岡齡已遷浮萍踪跡思君面征

楓江之西塘每出城必造訪

鴈殷勤寄我書顧李聯吟攜濁酒沙張把臂剪畦

蔬謂顧祿百李勉百

沙斗初張崑南他年和仲還山後隙地先為

置一廬

煙雲供養畫禪居珍重郵傳尺壁如皴染意兼文

沈筆隱淪義取列莊書

岡齡畫狎滿庭穩帖黃山

鷗圖寄贈石抱甕閑澆赤甲蔬素絹麻牋足箱箴可能頻寄

浴堂廬

玉堂茅舍總安居宴坐天花證六如無那繫匏南

北路祇餘置袖短長書秋風蘼阜飛寒葉夜雨吳

山長嫩蔬回首音塵頻悵望幾時對掩兩蓬廬

秋夜與婦話舊事因念江村卜築悵然有

贈四首

蠟淚成堆照不眠琴絲鬢影總堪憐滿階霜葉秋
如夢四壁寒蟲夜似年病後情懷拋繡線瘦來梳
裹廢花鈿悼殤憶母都無那望斷江南薊北天
數載東華不自聊綠牕並坐感蕭騷寒衣刀尺陪
宵讀瓦鼎茶湯待早朝馬磨勞生還憶共犬臺餘
恨可能招卻啖割肉容臣朔但把清齋學細腰
酒漿機絞每親攜不似金坡學士妻摒擋頻煩搜

蓋篋措持多愧蓄鹽糞於陵聞說曾逃聘萊氏原
甘共灌畦回首白沙村畔路木棉開處鷓鴣啼
睡鴨香銷玉漏窮流塵深掩小房櫳何妨放誕時
卿婿聽唱風波欲惱公天畔登樓長客裏燈前擁
髻總愁中一龕底處雙棲穩水北花南結托同

題蔣心餘詩卷四首

盤空佳語大河橫碧海無雲夜月明捨筏登厓君
自遠矜羊挂角衆偏驚

送別登臨壯且哀華嚴彈指現樓臺好詩不是人
間學骨性中間帶得來

酒品從來專貴辣菊花聞說最尊黃若論黃色微
偏在辣味當今獨擅場

木大如魚駭殺儂橐駝腫背豈相容勸君行卷牢
藏弄慎勿輕貽張伯松

家澹人上舍菊莊圖

高人不耐車馬喧名花不稱盆盎種池邊野外苦
竹籬雨倒煙欹任疎縱得全于天轉有態花之知
已惟君共絕勝錦幙十層遮胭脂牡丹世所重君
家莊窠最佳處瀟灑江村傍章貢兩牀菡席一
門獨速蓑衣臥茭葑每從農叟和田歌不怕少年

窺屋棟弁陽嘯翁有遺方黃梅雨過香泥鬆此時
菊秧乍可分幾簇陳根手培壅低叢掩冉覆小棚
轉眼繁枝裂霜縫圓釘箇箇金鈴齊濁酒時時白
衣送冷瓷或課跛奚澆宿萼還資膽瓶供大類天
隨舊宅荒頽垣缺處花補空可憐如此好家居何
事輕拋蹇驢控秋花正開悔遠遊秋卷頻年嗟不
用愛君結習狂未除那羨侏儒一囊俸豐臺淺撥
市新栽客舍得閑仍抱甕攜將橫看對花披彷彿
鄉園來入夢落英無言人澹如詩品高寒恣吟弄
風塵留滯跡雖孤笠屨登臨飲猶痛乃知寄興迴

自殊逸氣昂藏漫驚衆古來達士多高躅托物流
連忍飢凍香留晚節每延賓餌得身輕欲騎鳳此
圖寓意良可尋好配茶經追橘頌

張叟荷笠圖

吳興筆法傳其甥老米溪山付其子古來藝事有
淵源往往師承妙神理墨岑山人我老友皴染雲
嵐盈素紙披裘帶索入巖巒散髮垂竿弄煙水胸
中丘壑自天成腕下淋漓乃餘美偶然給札到春
明奉

敕舍毫朶殿裏大圖小嶺時經進

至尊動色嗟神技聲名官職一朝伸應奉年年仍
躡履老愁肺疾思捐珮歸結茅茨還掃軌長憂絕
筆少替人粉墨蕭瑟終已矣猶子月川今靜者高
秋訪我宣南里袖中亦有五岳圖山人遺法依稀
是爲言俗工失古格形模塗澤空爲爾興來盤礴
一解衣二華三茅分齒齒鴉尾樹枝濃欲滴磬頭
山色青不已上追董巨有前型下逮倪黃究深旨
取材衆家入鑪錘不離家法終神似更攜橫卷索
新詩卷上須麋何魁壘行歌荷笠自倘徉悵望南
山白雲起我撫此圖重歎息顧影沉吟良有以憶

同山人客淮壩席帽青衫共行李酒酣快睹醉墨
灑乞得縑繒滿箱匱人事浮雲多變滅俯仰舊遊
將一紀交逾兩世我欲老重對小友能不喜長安
僦居苦喧啾那得雲泉洗心耳遙峰一角肯見貽
挂壁臥遊從此始

題裴侍郎漫士苑東寓直圖三十韻

石甕山東海淀西苑門左畔繚垣低溶溶漾漾泉
浮岸下下高高圃界畦退食羣公交接席近光彩
筆忽更題

樓額公所署名

新居前歲纔承

寵

賜第在石虎衛衙

家具從今又別攜澹宕雲嵐連紫閣

從容休澣出金闈
午橋豈是蒙君賜
鑑曲何曾傍
斗奎舊事較量

恩獨重蕭齋料理與無睽
百弓曲徑閑栽竹
十笏

空庭不貯泥
園割澄懷分翠嶂
地為澄懷園西隅
軒鄰麗

景繞迴谿
其前即麗景軒冢宰汪謹堂先生所居
嫩蒲似劒方抽筍

細柳如絲乍發萸
短笻臥來橫
蝦蟆小船撐去亂

鳧鷖恰當幽處開
風慢轉入回廊
上閣梯紺軸三

倉籤壓架紅牕六扇殼
釘蠡坐欣搏黍枝
間轉愛

聽春鋤煙際啼綠
暗前村聞叱犢
雨昏遠陌見扶

犁傳宣瀑直仍餘暇
茗椀棊枰每並齋
客到盤飭

油不託牆頭酒注玉倫提時時按譜呼琴叟

琴師錢叟

雲間人

客公所往往澆花賁跛奚陶寫情懷應類謝疎慵

骨相肯同嵇此間境地原瑤島自有丰標比白圭
人仰光風多煦拂我從學海問端倪偶來剝啄宵
留榻幾度經過馬便嘶燈下樽前談最劇藤梢橘
刺路寧迷乘輅徼外旋銜

命持節河壩再閱隄萬里星霜勞往返九霄池館
重攀躋試教妙手圖橫看乍訝雲林滿赫蹏冉冉
連岑露髮髻盈盈一水滑玻黎清時臺省風流別
達士襟期出處齊縱使申歸還如入依然雪抹更

風批太平良會真堪羨何必煙霞讓退棲

十月十一日奉隨

駕之

命二十五日啓行出德勝門由湯山至盤山歸至

南苑

大閱禮成途次即事恭紀二十四首

傳來

天語最分明特許雞翹扈

蹕行九九屬車儀衛盛也容欵段一書生

觀風柔遠事難忘武備還須較廣場識得

聖謨真遠大區區羽獵陋長楊

千林紅紫帶霜痕細路平沙遠近村剪剪帽裙風
漲處搖鞭纜出國西門

土城已過又清河暗壑淙淙響白波不用登臨頻

弔古時平戰壘久消磨土城明英宗嘗駐蹕清河元禿堅帖木爾稱兵處

止頓傳呼

帳殿開碧虛樓閣敞雲隈山靈特爲

宸居在預遣跳珠濺玉來湯山有溫湯山以此得名

湯山山色翠連娟山上離宮山下泉最是晚來疑

畫裏紺螺浮動小瓊田

太平氣象在西疇刈罷家家說有秋一段鄉村好
風景稻堆高出屋山頭

近光尤切近畿民望

幸真如望歲殷黃口兒童黃髮叟扶藜騎竹迓車
塵

射柳分行靜不譁

天弧每發閃流霞儒臣侍從欣觀禮

教旨傳宣坐賜茶

三家店行官上親
率內大臣等習射

中黃夏育猛鬚角力程材各逞奇得勝旁觀齊

喝采上前飲酒謝

恩時

射畢觀獵
士角無

汲井支牀傍陌塍侍臣野宿各分朋中宵望月周

廬外萬點春星萬帳燈

面臨薊野背盧龍突兀田盤翠黛濃指點鬱葱

行幄外單椒秀出四三峰

盤山有上
中下三盤

巖均深處盡名藍

睿藻拈來大可參雲罩鐘聲如半偈天成橘樹小

江南

山有雲罩寺
應須隔歲一來聽

御製詩云雲罩鐘聲如半偈
又天成寺江天一覽閣中

栽橘樹故御製又有橘月燕山
吟橘樹春風一室小江南之句

安息條支自極西瞻

雲稽顙共扶攜圖開王會長筵設樂奏鈞天法部

齊

西哈薩克全部來降于
盤山行宮入 觀賜譙

聲教從看及萬邦好令立本繪奇麗

盛朝樵牧知王道封魏無須恨不雙

略識徐無返自厓嶙峋紫蓋繫人懷花憐半放酒

微醉如此看山亦復佳

山一名徐無紫蓋其最高
峰時子三宿山下然諸名

勝實未到也

南紅門裏草初枯鉤盾閑田掌上鋪舊是

天家飛放泊黃羊斑鹿散平蕪

萬騎雲屯海子寬瞭鷹臺上早霜寒吾

皇夙戒臨戎帳隊隊材官並據鞍

畫角吶啞響半空綠旗兵合火茶同箕張昂萃都
成勢虎變龍騰各自雄

草頭一點疾于飛槍急身輕乍合圍烈焰忽騰開
巨礮雷轟地軸駭神機

鄂褒英衛盡能軍鴈翼魚麗八陣分細柳威儀今
再睹會看絕域掃埃氛

彌山絡野網周陸講武歸來校獵初已喜從羣歌
吉日還在鎬詠那居

玉樓平地聳孱顏十二珠簾縹緲間南苑南頭放

煙火萬民同樂賞鰲山

禮成慶洽沛醲膏

星罕初迴矢載弢珥筆空慙才蹇劣可容隨輦附

查高

初白江村兩先生均有隨輦集

盧侍讀紹弓檢書圖

平生文字緣夙世結習染失脚軟土中駛景去忽
閃偷閑擁殘編自笑生活淡盧君我同志百氏肆
披檢衣袖有油素籓溷必鉛槧六扇紙牕風二尺
短檠燄食蓼逾覺甘渾忘羹不糝怪君榮利途嗜
退憚趨險于此顧獨貪兀兀意未嫌去年

簡內直晨入五鼓紃歸來捲書帷依然板扉掩紛
紛紺軸排一一雌黃點馬史千年來紕漏尚可攬
桐川兼秘省宋刻互增減爬梳一何精毫髮庶無
憾君撰史記考證我聞集賢官東廊資校覽體中彼何如
上車毋乃玷如君職業勤直匹歆與儉一鷗許來
借子祛我欲摻燒燭復引杯扁舟忽興感

李給事西華巡臺賞番圖

鄒衍談天語徒詭徐市求仙亦惘惘不如巡臺極
慨慷壯遊真作淩雲想廈門澎湖渡飛槩周巡所
到還行賞篋笏萬箇榕十丈地衣簾額蹇雲幌階

前立侍百夫長作使花蠻來浩穰雜選彌環兒負
襁嬖姍蹙躉叟拖杖攀林出箒自成黨馬崎赤嵌
度良康銅鑲貫耳帕抹頰赤紵裁衣剝纏髻兩鬢
簪沙目睜曠雀躍鳧趨頭地搶使者傳呼賚錢鏹
綵花撞布青紅晃釣藤酒香盈甕盎蹈舞牽扛轉
相饜

皇恩宣布咸慕仰

聖化滂洋何蕩蕩我聞此地真滌沔天外雲濤堆
滉瀆八罩港東澳門敞湄洲南去三星朗東西幾
干路莽蒼大岡彛漢中分壤雞籠鼻頭峰直上鬼

儻山下驚波盪咖留吧人此伏莽小醜相繼爭搶
攘桓桓施祖實骯髒剷棘除榛溯疇曩百年來王
復來享猓獠舉踵咸內嚮况有侍臣秉英蕩諸番
益扇仁風廣畫師遠勢工蕭爽遙村煙樹平如掌
斷橋泱泱流泉響樺皮屋子高而廠布穀催耕聽
哢吭番兒鞭牛駕犁鞅番婦繅絲勤績紡此時歸
舍攜珍帑相戒作息棄刀仗嗚呼人生屐幾鞞羨
君鯨波自來往還

朝依然開露輞曲江置酒排銀牒

戊寅除夕

一杯歲酒任曹騰六載長安此夜燈藥力消磨餘

健在時嘔血詩篇整妮付鈔騰錄丙子以碧山未

稱銀魚好三月恩珠顆還欣老蚌增十月得留

得癡狀何忍賣從來有味在無能

巳郊人日立春恭和

御製韻

先庚吉日迓青旗是日巳丑人勝還兼春勝宜正是東

皇布令日聽傳西極凱歌詞土酥隴上滋新麥盤

縷筵前簇綵絲穀旦明裡

親涖處陽和巳共

玉輿馳

翼日爲穀日 齋宿于初九日 行祈穀禮

題韋舍人慎旃翠螺讀書圖四首

地多古意傳供奉人有清才替左司
寂寞江天雲霧裏想君攜卷獨吟時

碧筍瑤簪翠掃空天門西上赭磯東
把茅蓋頂何時就便署頭銜作長翁

長去聲

猶記青衫浪出遊阻風中酒滯扁舟
山根一宿吾猶戀况汝僧牕數載留

官清贏得一身閑瀑直歸來善閉關
但使讀書能不廢何須悵望說還山

金軒來文學招同錢籜石編修韋葯仙舍
人謝金圃編修吳杉亭舍人錢辛楣贊善
家蘭泉舍人遊萬泉莊

九十春忽半枯坐成書癡金生來喚我今日花朝
期城南足煙景斗酒聊可攜蘆塘可遊釣苔磴可
攀躋何苦擲心力鑽此故紙堆拋書笑絕倒此語
良復佳撩撥我狂興破費君酒貲迢迢白紙坊漸
少塵侵衣莪莪右安門出城行長隄溪山我故人
數載會面稀今晨喜相見翠色浮鬢眉雙輪簸復
傳殘夢醒復迷恰如擘子船搖兀翻忘疲行行三

四里道旁見殘碑感彼柏下人學仙塚累累大元

邯鄲子荆公神道碑稍南又一塚長生道院基亦了

有仆地石模糊剩銘詞曾聞神樂觀舊隸太常司

云何列卿銜乃昇黃冠師始知明中葉秕政日以

滋太常寺卿馬良德寺丞王應回首陵谷遷剥落

螭與龜惟餘濫泉聲遙和松聲哀飲馬投一錢驅

車向前陂西山疊嶂繞懸瀑跳珠璣散成萬千眼

處處波滌洄此地林壑幽狀流互透迤或圓偃如

月或方橢如珪是萬乃強名其數孰細推昔為鶯

鳴所遊人不敢窺相傳前明畜鶯鴨處今茲盛亭

西莊始存稿 卷十二 圭

榭縱橫插笆籬猶記祖家莊妙絕漁洋詩莊雖數
易主水木仍清暉入門乍空曠汪汪數頃池略約
繚而曲池水清且漪春雪暖乍融輕冰解流澌東
風吹綠皺蹙作鱗差差蕭寥洲渚外蘆筍生未齊
白鳥來何心翻飛雪襍褻土山遠多態岡壠分屣
屣亂篠戛琅玕雜樹紛間之登登步高下一步神
一怡邃館與涼堂竄窳連廊窳亦有卵石徑亦有
郢局畦所惜來太早髡柳尚少穉何況紫丁香朱
藤黃茶蘼我儕樂閑放不在繁艷時愛此荒寂景
轉得一段奇攀林蹋閣遍乘興尋招提

萬泉寺
在莊後像

設妙莊嚴刹竿矗歲巍蒲牢吼如牛也復明代遺
鑿名字天斜大抵皆闍兒奚奴頗解事行厨咄嗟
移招要入林間栲栳坐水湄自詫酒腸寬飲若灌
漏卮坐中六七公同里數辛楣若論相識久老錢
及瘦韋予識籀石莠仙在庚申辛酉間
距今二十年諸公訂交皆在後我兄近逃
禪吳謝各不羈獨有賢主人乃是新相知樂哉今
夕會醉起爭留題試待紅藥坼重來問豐宜

同作四首

全椒 金啓南 軒來

帝里春暉好花朝出郭宜名園足幽景勝侶偶探
奇草色平蕪淺山容宿雨滋何期雲棧客來共

此追隨

子自蜀
中至京

遠樹連村暗柴門一徑通橋平殘雪水籬偃古
藤風正壑隱松翠亭臺亞竹叢城南即韋杜相
賞意何窮

婀娜生憐處垂垂岸柳毯風沙仍蘄北煙水忽
江南對此興堪遣因之酒易酣閑將故鄉思乘
醉一清談

雅遊耽好景坐久欲忘歸啓戶見明月驅車趁
落暉不孤佳日會還念素心違料得朝回處焚

香靜掩扉

寶所鶴侶漁
菴期而不至

王保定孫同申江歸釣圖六首

宦轍名場已卅年釣竿陡憶海東偏人間何處真
安穩萬頃波心一葉船

寥廓高名孰與儔公才未許說宜休一麾暫寄絲
綸手只似東坡在定州

黃歇渡頭蘆荻花鯉魚風急浪淘沙清詩樂府爭
傳唱別譜漁家與笛家

漫郎放棹入洄溪魚麥關心謝組珪怪得從來賢
刺史每耽雲水狎鳧鷖

愛閑真擬帶笭箬白翦青蓑早織成卻笑平泉好

風景贊皇一夕若爲情

江村我有舊漁磯
申浦膠城近不違
走卻鰻魚定
何日春風燕子又飛飛

即目二首

玉河冰片未全融
岸岸楊椿自颭風
行出便門天
欲曉大通橋外月如弓

鬪起雙隄角樣偏
慶豐牖口溜涓涓
兩三敗舫停
沙嘴好似長江楸子船

太學古槐歌

橋門辟雍泮水涯
森森黛色撐古槐
濃陰遍覆數

畝皆靈根盤屈高枝排鳳翎軒翥雲中迴蒼虬跋
浪揚其顛長風忽起洪濤堆樹外仍覺晴雲開微
颺徐透筭瑟諧曉煙輕冪新如楷傳聞髣髴徵從
來云是元至元中栽祭酒當時推魯齋姚樞竇默
稱輩儕一朝赴召起自懷勲戚子弟資模楷講誦
餘暇薙草萊移來嘉蔭親封培閱年五百修柯摧
斷節餘蠹膠流苔欣逢

聖世天網恢陽春鼓動抽條枚維時壽宿明中台
慈寧方進萬年杯九如遙祝耆與鮒茲槐協瑞和
氣胎苧甲暗坼如松釵新茗舊穎繁毳毳飄英落

蕊飛漼漼

辛未

皇太后六

我

萬壽槐復榮

皇治理追羲媧文明武赫敷埏垓化被日出兼無

雷西域耆定歌康哉誅鉏驅虎驅狼豺

鴻文勒石高崔嵬陋彼樂府侈渥洼肖翹畢育無

纖乖此樹亦復登春臺巒堂大啓羅英才青衿濟

濟簞笠偕菁莪棫樸儲鹽梅神工潛滋化雨催普

潤弱植霑枯稽槐兮應候榮根芨濃花碎葉紛皚

皚諸生習禮此徘徊共愛翠樾清陰佳榮光上燭

貫斗魁我

皇文治瞻昭回微臣趨承愧不材叨陪舍菜陳尊

壘摩挲古幹芹宮隈作歌拜手仰
泰階敢繼萋萋鳴雞喑

眼底

十圍便腹自空虛眼底羣兒謗任渠
念動向來枉讀半生書疾雷擊柱從驚破
倦絮黏泥那受噓展卷聖賢成晤對青熒燈火閉門餘

西莊始存稿卷十二